



13684 5514
2895
:2

先恭勤公年譜卷二

男彬
桐恭輯

道光二十九年己酉六十三歲

正月奏請

陛見得

旨著於本年冬閒再行奏請欽此

二月惠太夫人率孫承烜承煜進京

三月奏陳訓練撫標兵弁情形得

旨覈實認真勿尙虛文爲要欽此

奏現辦清查大概情形 略言東省地廣賦輕
州縣舊有經費足資辦公閒有途衝地瘠費用
不貲通省各缺亦十止一二近年以來銀價增
昂州縣歲入稍絀牧令不思量入爲出轉於一
切私用誇多鬪靡奢侈相尙上下沿習成風此
歷年倉庫虧缺所由起旣已虧挪不得不多方
掩飾百弊叢生而其大端實在流攤列抵假墊
辦公事爲名盈千累萬恣意開銷詳稟立案入
於交代或作數年或十餘年分任流攤後任又

尤而效之正署迭更日益加盛每經一官必增
一二攤案而每年應攤還銀兩並不照數解存
司庫新舊交卸竟以流攤曾經立案不復問其
所攤銀兩是否解還卽行列抵名爲有著之款
終無歸補之實倉庫盡成虛懸且有本無虧項
而藉款攤抵以飽私橐者更有前任無虧而後
任轉爲捏款朦混如_臣另摺所奏前任濮州知
州劉慶凱攤案係後任朦詳者流弊至此實堪
痛恨前撫_臣張澧中議請攤賠各款照案攤追

業經戶部議准彼時臣與前撫臣皆到東未久實未料及攤案之弊至於此極今徹底清查嚴飭各屬將歷年攤款據實報出洞悉其弊一州一邑竟有一年而爲前任攤銀五六千兩至七八千兩者在攤數較少尙不能按年歸還攤數旣鉅更屬虛懸若再迴護原議不將攤款截出仍令後任照案攤抵後任安得歲有餘貲爲前任彌補虧缺必致輾轉糾纏有攤之名無攤之實庫款永歸無著非惟舊虧不能截清卽新虧

萬難杜絕而現任官吏受前官之累辦公竭蹶百事廢弛吏治亦不可問矣以此攤抵無著之款溯委窮源執法究懲皆屬咎所應得顧以事經多年官非一任半係身故廢斥之員卽查抄著追於帑項無裨實濟且其中實有因公墊用之款事遠年湮難以釐剔一概參劾似無區分若循交代舊章惟現任出結之員是問則以一任而爲歷任完繳虧缺力有不及追賠仍屬有名無實竊思現辦清查總以歸補舊虧杜絕新

虧為提綱挈要臣督同藩司劉源灝通盤悉心
 籌計應請將現在各屬報出流攤各案除業經
 前後任攤出以實銀解補虧項應准扣除外其
 餘已攤未解及尙未攤及各款無論交代已結
 未結但係虛款列抵者盡行剔除並截止再攤
 清查案內歸於另冊開報逐案註明何員攤抵
 何年何項欠款一面公同籌款先行彌補一面
 就現尙可追各員仍行照數分別著追前奏清
 查章程亦會計及無著款項初請酌提節省繼

請接扣養廉皆奉部議駁今查通省州縣地丁
 項下有坐支官俸役食銀十五萬六千八百餘
 兩驛站里甲夫馬銀十四萬一千六百餘兩此
 內如教職佐雜俸薪及廩膳等款係實銀支發
 其餘領款皆係支銀用錢銀貴倍於疇昔用項
 實有贏餘酌提數成足資彌補俟通案攤抵無
 著各款覈定確數按各屬年額坐支多寡及缺
 分等次均勻覈提飭令隨同各該年地丁批解
 如有延欠照地丁未完例參處在各州縣歲省

攤款數千兩就此坐支贏餘酌提數成實爲眾
所樂從而司庫按年提解逐漸歸補報撥非同
虛擬無著之款縱或坐支一項不敷提補再於
各屬現存五成養廉內添提一二成亦屬眾擎
易舉統容定案月行分晰奏明辦理總期十餘
年內將前項懸抵攤款埽數清結以重國帑惟
欠款雖由公項彌補而原抵各員竟予置身事
外亦不足以示懲儆除病故廢斥實已無可著
追各員應毋庸議外其現任候補及丁艱告病

並本員雖有事故子孫尙有官職各員無論已
未離東均著落原抵之員各按其現抵虧數分
別追賠一萬兩以上限五年一萬兩以下限三
年依限解還如該員清查案內有限年應追正
雜倉等款俟前款完繳再將攤案追賠之款起
限接追限內全完應予免議完不及半卽行革
職完繳五分以上革職留任續經全完再予開
復原抵之員解還一成則公款彌補卽可少提
一成足昭情法之平此後惟年例捐款爲地方

辦公必不可少者如解餉津貼及部閩二確不
敷等款容_臣督同藩司逐一參覈量從節減務
令歲有定款用有定數造冊立案照常捐解交
代案內不准劃出另追總期十餘年內將前項
攤款清結此後永遠不准再有墊辦流攤名目
如敢踵習前弊將朦混捏詳之州縣濫批濫准
之上司均照侵盜錢糧律治罪現在清查

欽限已迫奉到部議尙需時日_臣已飭司先行查照
造冊辦理

敕原議王大臣會部議行

奏參降調知州史樸捏造流攤抵款請革職嚴
審得

旨從重究辦欽此

遵議裁撤山東泉河通判河南陽河通判二缺
以節浮費得

旨允行

四月府君親詣

泰山致祭循舊例也祭之日黎明登絕頂觀日出

維時天色晴霽祥靄繽紛下山見二麥盈疇豐收有象田禾亦多布種詢之農民皆稱暘雨應時爲數年來所未有奏

聞得

旨敬感

靈貺欽此

奏請借項修築濟甯等州縣衛民埝 略言濟甯州及嘉祥縣臨清衛境內隄埝與汶上同屬一湖頻年水患全隄多有倒壞於漕運民田大

有關礙亟宜修築而民力拮据自應先爲籌辦以資保衛計實需銀一千七百八十六兩四錢三釐請於司庫地丁項下照數借支得

旨允從

奏東省幅匪抗官拒捕槍傷差役比例擬絞請歸入秋審情實辦理以示懲創

上韙之

閏四月兼署河東河道總督時河督鍾公祥因病出缺故奉是

命

五月奏陳洋面防捕情形 略言洋面失事尙無隱匿不報亦無洋匪登岸搶掠情事惟閩浙會師勦捕匪船北竄實在意中本境洋面隨處皆可依泊更難保無沿海奸民暗地勾結亟須水陸兼防杜其窺伺前購快船已陸續駛回現飭配械出洋各島嶼口岸亦飭撥兵役擇要防守臣惟當會督鎮道嚴飭文武各員認真巡洋以防外盜嚴密守岸以絕內奸務使南匪無隙

可伺本境匪徒亦無由乘機蠢動儻敢稍形玩懈立即糾參力挽頹習得

旨認真勉力欽此

奏請於德州柘園鎮建立卡房稽查糧船私銷所需工價及官役薪水由商捐公費酌量支用

上從之

奏鄒滕兩縣二麥被雹請分別緩徵新舊錢糧

詔如所請行

六月勘明四女寺支河淤墊壩座墊陷奏請挑

修以利漕行

上從之

奏減鹽務面封公費 略言東綱引商銷引一
道捐銀二錢三分以資公用名爲面封公費由
來已久從前引鹽暢銷正課無絀以商運之羨
餘挹注通綱公用俾免遇事派累原屬官商兩
便今昔情形既異則不能不力求樽節以顧正
課且其支用各款有爲辦公所必需者亦有濫
支濫銷不盡歸公用者更須名實相符方可永

資遵守近來公捐面封歲入銀八萬三千九百
二十餘兩而按舊規歲需銀十萬二千五百十
餘兩捐不敷用以致運司庫款動多借墊套搭
不清實滋流弊臣會同

欽差大學士耆英戶部右侍郎朱鳳標籌議鹽務章
程奏明面封公費項下除公用外其餘浮費覈
實刪減計每年節省銀二萬五千兩以二萬兩
先行歸補歷年遞緩案內積欠餘銀五千兩飭
貯運庫代完參商懸課彼時亦祇就公費約略

覈計而未明定裁減確數今臣通盤籌計逐款
釐剔臣兼理鹽政向有公費銀一萬兩未經支
用緣臣巡撫本任養廉除攤解軍需及緝捕經
費並扣解減平銀兩外尙有銀一萬零九百餘
兩以臣儉約自持一切辦公所需量入爲出尙
不致有竭蹶然臣不敢矯枉過正盡行裁革致
使後難爲繼轉啟將來重行派累之弊應請酌
減六千兩留存四千兩以備辦公之不敷此外
各款應裁革者盡行裁革應覈減者酌量覈減

統計裁革一百二十二款覈減六十款共刪減
銀五萬五千六百九十餘兩每歲收存面封銀
兩先儘歸補積欠及參商懸課次儘各項公用
額引全銷款有贏餘以豐年運銷之所餘補歉
年滯銷之不足祇准就此定款分別支銷此外
不准絲毫再有增派亦不准於本款未經收足
以前借動庫款墊支庶期商力稍紓專顧正課
而於運庫出納亦不致別滋牽混

下部知之

孫承勳生 不孝彬出

七月遵議酌減漕務浮費 先是福建學政彭公蘊章奏減幫費請飭有漕督撫除弊裕漕

上以漕務浮費太繁州縣無所賠償必致報災減運令有漕督撫通盤籌畫府君奏言東省地廣賦輕州縣額徵漕糧聞有瘠貧下戶必須由官墊兌者亦屬無多餘皆踴躍輸將卽偶逢災歉展緩州縣尙不致以辦漕爲累無虞捏災減運上年漕糧新舊並徵較全額三十一萬三千餘石多

徵一萬四千餘石此其明證至各州縣兌漕幫費曾於道光二十六年因銀價過昂裁減三成值_臣到任未久於州縣辦漕利弊旣未周知且甫行一二年是否尙有應革應減之處亦須俟二十八年冬閒詳察州縣與幫弁運兌實在情形方可酌中定議茲糧道景霖押運全漕事竣回東_臣督同該道及藩臬兩司就二十八年辦漕情形通盤酌覈各州縣兌漕幫費其名目多寡不一惟折幫及代買二項爲全漕之蠹幫丁

全言 卷二 十一
之挾持州縣州縣之累及花戶皆由於此二十
六年籠統議減既未明指其弊而於不經名目
亦未逐款分晰釐剔故仍不免影射牽混應請
將折幫代買及各項瑣屑雜費盡行禁革一律
定爲津貼公費按各州縣二十八年兌漕給幫
之數如每石止於一二三錢者仍循其舊如每
石在四錢以上者卽以四錢爲限若逾此數計
贓治罪撥運薊糧派徵豆麥與正漕一律辦理
儻遇減運卽按實兌糧數分別覈給惟花戶兌

糧遲速不能如期州縣距水次遠近不等兌限
迫促每苦徵運不及爲幫丁所挾制應請酌量
由水次買兌總期不誤正供不准幫丁藉詞米
色不純多索費用若幫丁有意挑飭隨時酌委
大員秉公查驗分別參處幫費旣減則州縣取
之於民者亦應酌減如再藉口費重苛取病民
亦卽從嚴參辦抑臣更有請者漕糧項下尙有
撥運青州駐防滿營兵米及隨漕同徵之德常
二倉本色米石查青州滿營兵米由青州府兌

全言 卷二 三
收支放德常二倉米由糧道兌收以備德州駐防滿營月糧等項支銷此項米石經年存貯放舊收新一切廩座蓆片霉蒸盤折及看守丁役人等工食之資例款不敷原不能責令經手官吏常川捐賠然計其費用實較幫船長途轉運爲省向以米出於漕其弊亦與漕同今漕費旣減此項浮費亦應大加節刪且查兵米雖例定本色實則私交折價由收兌衙門買米支放相沿已久經臣於通籌州縣浮費案內飭司道會

同詳察情形秉公覈議茲據議詳前項滿營兵米及德常二倉米石其勒折浮費之由總緣徵兌州縣陸運耗累故收兌衙門吏役人等得以乘機挾日趨日重應請嚴申禁令仍交本色惟路程稍遠州縣或因雨雪載途車挽維艱將實在情形先期稟明始准通融酌交折價由收兌衙門於次年春融代爲買米支放其價以該年十二月分青德兩府州摺報糧價爲斷不准絲毫加增所需津貼之費無論本折照現定幫

丁公費再減一半每石不得過二錢似此明定章程收兌衙門無由藉詞浮索則州縣取之於民者亦應酌減如再藉口費重苛取病民立即從嚴參辦

下所司議行

奏陳海洋防捕情形 略言南來大小鳥船在洋游弋蹟涉盜踪當即分撥兵船扼要防禦瞭見成山頭洋面盜船圍劫商船兵船開礮轟擊救回商船進口又石島外洋盜船圍劫商船經

兵船與榮成縣雇備粵東艇船奮勇協勦擒獲盜犯呂杜年等九名又在威海貓頭山劉公島各外洋與盜船兩次接仗開礮擊斃盜匪十餘人又據榮成福山等縣稟報盛寶生等商船各在外洋被劫登州府屬洋面疊遭南匪劫掠多在六七月間今該匪等復於此時乘風北駛現雖據水師員弁在洋疊次轟擊先後救回商船擒獲盜犯似較從前泊船僻島畏怯不前者稍知振作惟商船仍有疏虞則防捕實未周密且

現在招徠商販運載米麥雜糧赴浙更須洋面
肅清商運始能暢行無滯此非南北各洋節節
巡防不足以杜窺伺現將擒獲各犯確審究辦
一面嚴飭鎮將及沿海水陸文武實力防衛一
面移咨閩浙江蘇各督撫臣一體飭屬不分畛
域協力勦捕得

旨隨時嚴緝勿懈欽此

奏陳清查通省州縣衛所正雜倉款虧挪實數
先是府君任藩司時查知東省虧挪積弊先

後詳經巡撫奏明勒限一年徹底清查並條議
勒追彌補章程

上以清查已立限期惟條分縷晰冊報恐遲令各督撫
趕造四柱清冊一分每省各以一府爲一冊統
以文到之日限八箇月辦齊不拘何時請旨順
派欽差前往各府縣抽查旋經

欽差大學士耆公英侍郎朱公鳳標來東查辦鹽務查
出濟南府十六州縣未完正雜等銀四十一萬
四千七百餘兩倉貯缺穀三十七萬三千八百

餘石

上命將濟南一府歸入山東闔省清查案內依限八月
趕緊清釐府君調集案據晝夜督辦奏言臣到
東後嚴定章程力杜新虧一有延欠立即參追
不准混入清查轉致懸宕故此次清查應以嘉
慶十九年十月初一日前辦清查完竣之日起
截至道光二十七年十二月二十七日臣到藩
司任前一日爲止惟事經三十餘年各屬交抵
款項勢如亂絲且其致虧之由雖由銀價過昂

地方舊有辦公之資入不敷出而其輾轉糾纏
實藉攤賠名目爲掩飾之計經臣將通省攤款
奏明截止各屬虧數始能得其實在底蘊濟南
府十六州縣未完銀兩一經嚴刪攤抵較

欽差原查虧數幾增一倍此臣痛懲積弊不能不覈
實從嚴之實在情形也至各屬賠墊各款項自
道光六年前撫臣陳中孚奏准賠款不入交案
提出另追日久相沿遂爲成例而各州縣屬庫
墊款自道光十七年前撫臣經額布及二十六

年前撫^臣崇恩兩次奏明清釐歸於接扣二成
養廉彌補雖款未報部覆准而在各屬實已詳
稟上司批准有據不得不予照案開列聽候部
議此又^臣於嚴覈之中稍示區別之實情也今
^臣督同藩司將通省十府二直隸州所屬一百
十二州縣衛所三十三年內正雜倉款解支完
欠及墊抵各款悉心釐剔徹底查明除歷年專
案奏參虧缺銀一百七十八萬八千八百四十
六兩三分三釐賠款應行咨追銀一百七萬二

千四十八兩三錢二分七釐屬庫墊款歸接扣
二成彌補銀四十六萬八千兩七錢六分一釐
應追書虧等銀一萬六百七十七兩八錢五分外
計流攤著賠銀一百三十一萬一千兩六錢八
分二釐實虧銀一百四十四萬九千三兩一錢
八分六釐伏查倉庫錢糧絲毫皆關國帑東省
州縣積虧至百數十萬之多按律參革治罪皆
屬咎所應得今既仰沐

恩綸寬其既往謹將查出各員實虧及攤款著賠各

數分繕清單恭呈

御覽可否

敕部查照議准清查章程將虧挪各員分別革留摘
頂按限追繳彌補之處出自

逾格鴻慈至此次清查臣雖竭盡愚誠督飭藩司及

委員等不敢一毫放鬆而年分久遠員數眾多
難保別無欺隱仍乞

欽差大臣來東抽查以昭覈實

敕原議王大臣會部議行

奏截止流攤仍循前議追繳彌補 先是府君

因東省虧缺弊在流攤奏請將攤款截止提解
各州縣坐支銀兩彌補一面就現尙可追各員
分別著追經王大臣會同戶部議覆飭將查出
流攤各款覈明總數奏報其應如何彌補之處
統俟八箇月清查完竣冊報到日再行覈議並
飭查明率准詳稟立案之各上司分別成數著
追一併造具員名清冊咨送覈辦至是府君奏
言通省流攤未解各款共銀一百三十一萬一

千兩六錢八分二釐此項攤款抵虧皆關正雜錢糧自宜一面籌款彌補一面著落原攤之員勒限追繳兩議並行庶期國帑速歸有著臣前以各屬坐支等款皆係支銀發錢銀貴倍於疇昔用項實有贏餘且現任各員既免前任攤累就此坐支贏餘酌提數成亦屬眾擎易舉惟各州縣截刪攤款多寡不同坐支用項繁簡互異情形絕不相侔臣督同在省司道府縣博採眾論悉心參酌各屬額設坐支項下如驛站里甲

夫馬役食公費腳費一半鹽當規禮及扣贖五成養廉等款或按成並提或酌提一二款或按成並提之外覈其歲省攤款尙浮於現提之數者酌量加提總期各州縣力能完解不致有名無實歲以十萬兩爲率卽自本年秋季爲始飭令隨同上下忙正耗錢糧批解如有延欠卽照錢糧未完分數一律查參約計十二三年卽可將前項流攤列抵之款埽數彌補仍查明原攤各員如係現任及候補丁憂告病以及本員已

全言 卷二 未
故子孫尙有官職者無論已未離東照案著追以冀原攤之員解還一成公款彌補卽可少提一成合無籲懇

聖恩俯賜

敕部查照臣前奏分晰覈議以便通飭遵照辦理

下部議行

奏裁州縣浮費嚴提扣款以補舊欠杜新虧略言州縣虧缺之由一因銀價昂貴豐歉不時各屬舊有辦公之資日形短絀一因公事日繁

如緝捕捻匪墊辦軍需收養流民解審命盜等案津貼口糧一切意外之用年甚一年有增無減一因州縣流攤之案日積月累後任受前任之累輾轉糾纏愈趨愈重一因年例捐款如剝船工食膳黃工料科場經費及不甚緊要之外辦工程院司各衙門書吏飯食等款遞年加增漫無限制而漕糧兵米勒索浮費尤爲有漕州縣切膚之害一因近年以來習尙奢靡牧令不知量入爲出轉於私用踵事增華五者相因倉

庫錢糧遂不可問故歷年參革監追虧數多至
一百七十餘萬兩而隱匿不報至清查始呈露
者尙兩倍於此今欲彌補舊欠杜絕新虧非嚴
提錢糧以裕庫貯裁減浮費以恤州縣崇尙節
儉以挽頽風無以清其源而遏其流臣既將通
省一百三十餘萬攤款奏明截止已免州縣交
代無窮牽累又將各屬徵兌漕糧兵米一切浮
費盡行奏請裁減茲復督同在省司道府通盤
籌計將遞年加增之年例攤捐各款大加覈刪

統計歲可節省銀十萬餘兩凡此有名之派累

臣得按籍以稽者亦幾搜索無遺其他一切無

名耗蠹有非文檄空言所能盡禁而潛消暗蝕

不可以數計者臣惟身先屬吏力圖儉樸董率

司道府一體寬以恤下使州縣從公無竭蹶之

虞庶幾彌補舊欠不致有名無實而杜絕新虧

嚴法懲創各牧令亦無所庸其藉口矣臣復查

各州縣養廉項下尙有應扣軍需三成盤查二

成截至本年夏季未扣銀九十四萬六千餘兩

盤查之後繼以屬庫墊款應接扣銀四十六萬
八百餘兩前以各屬攤款較多解司養廉率儘
外用轉於軍需盤查兩款未經按年扣足今各
項捐攤大加覈減應先儘軍需盤查兩款按年
提扣歲可歸補銀八萬七千六百餘兩合之截
止流攤案內提解坐支銀十萬兩共銀十八萬
七千餘兩自本年秋季爲始飭司設立專簿儘
提儘扣每年春秋二季悉數報撥仍於年終專
案詳奏以備稽覈如有應扣不扣著落藩司賠

繳至各屬正耗新舊錢糧

臣

與藩司劉源灝先

後接催二十七年下忙該年收數已較二十六
年多銀七萬四千六百餘兩二十八年則較二
十七年多銀三十四萬一千餘兩較二十六年
多銀四十一萬五千餘兩以後照此嚴覈提催
不稍鬆勁則增收新賦與扣款彌補舊虧司庫
歲可多入銀五六十萬兩日計不足月計有餘
數年之後庫貯漸充東省尙可期爲完善之區

敕軍機大臣會部議行

奏請優獎久任知縣錢糧無虧 略言東省州縣無缺不虧亦無缺不有流攤濫抵之款前後任豫爲交代糾纏之計積習相仍牢不可破惟查有泰安縣知縣朱家學掖縣知縣李廷樟恩縣知縣邱文藻皆悃悞無華循聲卓著從前歷任各縣或十餘年或七八年經手錢糧絲毫無虧亦無流攤抵款似此結實可靠不爲習俗所移洵爲全省中僅見之員請將該三員

敕部記名遇有本省及別省直隸州知州缺出由部

開單請

旨破格擢用先換頂帶以昭激勸

上從之並

賞加朱家學李廷樟邱文藻四品頂帶

八月入文闈辦理鄉試監臨事

奏參總兵督防洋面不力 維時洋面商船疊

遭南匪劫掠總兵德通報稱兵船遭風旬日不

出文登縣知縣汪澄之稟稱總兵回郡弁兵懈

弛洋匪擾及島民府君以德通託故遷延請革

去頂帶勒令出洋捕盜得

旨所參是惟屬寬縱耳

命解德通任交府君提訊

奏陳嚴防海口購捕盜首情形 略言東省洋面遼闊水師汎廣兵單南匪乘虛窺伺榮成縣知縣石用熙會雇覓廣艇擒獲盜犯九名又在雞鳴島洋面與盜船接仗擊碎篷桅盜匪落水死者十餘人救回被擄商船四隻又在俚島洋面有盜船望見艇船向南逃避艇船駛追開礮

轟擊沿海募船聞聲趕攏圍獲盜船並盜匪蕭

進利等三十二名

臣

伏查本年匪船聯踪北駛

多至數十隻必有爲首糾集之人飭屬確訪據文登縣知縣汪澄之稟報該匪等因各島不給薪水妄造告示恫喝島民其具名者爲陳雙喜似屬首逆正在密飭營縣懸千金重賞設法購捕適知江省訪拏盜首陳雙喜諒該匪必不敢南歸轉瞬深秋風高浪勁商船亦將停權該匪無可擄掠必思鋌而走險非撲口岸卽擾沿海

各島臣已飭鎮道調派師船帶同廣艇在登州迤東分段巡緝一面遴委將領並飭沿海州縣添募水勇載運大礮嚴守口岸分防各島禁止漁船以杜通盜一面飛咨江省於接壤洋面多派師船扼其歸路使其留則無食退則無歸若撲岸傍島則水陸兵勇內外夾擊務在擒渠以安商旅得

旨若能拏獲真正盜首陳雙喜厥功偉矣勉之欽此

九月奏陳清查臨清關庫 略言東省州縣虧

缺業經分晰清查酌籌彌補卽司庫墊借等款亦逐一清釐勒限追提惟臨清州經徵戶工兩關稅銀歷年收支惟憑州冊茲查歷任正署交代州庫與關庫均係統除統算其中多有軼轄雖歷奉部撥從無延誤第庫款慎重自應一律確查務使州庫與關庫詳晰分明儘數提解款歸實貯方爲周密現已飭調案據款冊勒限根查得

旨報聞

五言 卷二 三
覆奏漕費不能盡革情形 東省漕務浮費瑣屑已極府君盡行禁革止定爲津貼公費如各州縣兌漕給幫每石止於一二三錢者仍循其舊每石在四錢以上者卽以四錢爲限逾數計贓治罪漕糧項下撥運青州滿營兵米及隨徵德常二倉米照幫費減半每石不得過二錢尋奉部議以東省軍船出運與江浙等省遠涉數千里者不同嘉慶四年准給曬颺耗米一款卽係議增津貼之項不得於津貼之外再議津貼

兵米與德常二倉米津貼之費亦屬例外增添均議駁府君以漕費不能盡革據實瀝陳略言東省漕船以十丁配運一船每船例給行月潤耗蓆片等項僅止米九十石銀八十餘兩雖東省距通倉較近與南漕之渡江渡黃提溜打牖節節耗費不同然每歲自八九月間修艙雇夫受兌守凍次年春初開行抵壩交卸五月間方得回空事經八九月之久計一船丁舵夫役不下數十人工食費用例款不敷故自有漕船卽

有幫費非法不能禁實勢有所不能盡禁者嘉
慶四年清釐漕弊前撫臣陳大文以陋規裁革
丁力拮据奏請將例折行月糧米每石加給旗
丁銀七錢經部臣議駁僅准於旗丁原備交倉
曬颺耗米內劃給一升七合丁用仍屬不敷故
當時名爲革除陋規實則橫索如故今距嘉慶
初年又逾五十載銀價增昂百物倍貴幫丁費
用不支較前更甚彼時州縣兌漕每糧一石幫
貼旗丁銀四五錢今每石已加至七八錢旗丁

津貼不敷宿弊未能盡除遂致輾轉益甚此其
明證臣前奏將各項浮費名目盡行禁革量給
津貼公費以四錢爲率蓋已就數十年前至少
之數嚴示限制今部臣併此議駁不容輕改舊
章此項續增津貼原爲例所不載部臣執法以
繩臣何敢復行爭辯顧身任地方目擊情形不
能不順人情以爲治尤不能不資羣力以集事
若遵照部議絲毫不准妄取遇有干違嚴法懲
創則幫丁疲累羣情渙散必致貽誤漕運所關

全言 卷二
匪細若陽奉陰違仍聽其私相授受而不明定
限制則州縣受制旗丁必致累及百姓更恐狡
黠幫丁以臣奏減浮費業經部議恣意橫索益
無顧忌卽有強項之令稟爭訴辯而漕糧兌限
迫促先以誤兌獲咎其弊實有不可勝述者至
兵米與德常二倉米石雖費用與漕務有閒而
經手吏役責令枵腹從事亦轉滋勒索之弊臣
再四參酌法期可行弊去太甚謹將實在情形
瀆陳於

聖主之前仍懇

俯准照臣前議量給津貼得

旨戶部再行覈議具奏尋如所議行

是月補授四川總督府君具摺謝

恩請面聆

聖訓得

旨著來見欽此

府君復以鹽務籌辦有效請以後慎守新章
略言東省鹽務疲累已久商情渙散幾慮補救

年譜 卷二
無術上年

欽差大學士耆英侍郎朱鳳標來東會籌新章又得
運司聯英接任其事督課恤商動中肯綮治人
治法相輔而行未及半載積弊頓除口岸懸引
或歸官辦或令商認俱已領運有人本年額引
四十萬五百道額票十四萬餘道秋季未終運
銷已及十分之九徵完正課加價彌補積欠等
款共銀二十九萬五千餘兩十一月閒引課卽
可埽數全完以後慎守新章務從節儉年清年
款舊制可復得

旨嘉獎

奏請量予委辦清查各員曹州府知府李天錫
等獎敘有差

是月 不孝桐 舉於鄉

十月到京請

訓

召對五次

上以鹽務大有起色

溫諭褒獎

垂詢家事甚詳時以 不孝桐 濫登鄉薦

上溫語及之許來年必成進士府君回寓傳宣舉家感

幸

十一月

陛辭出京

十二月抵四川總督任

道光三十年庚戌六十四歲

正月驚聞

孝和睿皇后升遐率僚屬哭臨如禮

二月驚聞

宣宗成皇帝龍馭上賓府君攀號倍至率僚屬哭臨如

禮具摺奏懇來京叩謁

梓宮得

旨毋庸來京叩謁欽此

查辦各屬倉穀 先是前總督琦善遵

旨查辦倉穀以碾動倉穀中多窒礙等情入奏

上命府君確查倉穀是否霉變如已霉變即照例參賠

府君奏言州縣額存常監倉穀實存無虧亦無
霉變惟米質碎小若任其陳陳相因則歷年積
欠紅朽堪虞自應出陳易新方足以資儲備臣
現飭該州縣各就地方情形或平價糶賣或按
糧出借秋收後照數採買免息收還歸倉並酌
量存七糶三或存半糶半先儘年分最遠之穀
分年出易約計三四年後可以一律變陳爲新
仍隨時密查儻有侵漁立予從嚴參辦如有霉
變亦必勒限追賠以備倉儲而裕民食

下部知之

籌備緝捕經費 略言川省爲邊陲重地山埠
叢雜水陸交衝時有咽匪聚眾搶劫巡防緝捕
均關緊要派撥兵役懸賞購綫非有經費不行
藩庫別無閒款可籌遇有要需不得不借用藩
庫銀兩竊思國家經費有常與其臨時區畫莫
如先事豫籌臣前在山東巡撫任內緝捕捻幅
各匪經費無出因通飭州縣力崇節儉刪減浮
費以撙節之有餘補經費之不足歷經奏明辦

有成效臣到川後體察情形亦與山東略同當
卽通飭各屬仿照山東成案量力捐廉解交藩
庫事旣眾擎易舉而常年經費亦可有備無虞
通省文員無不樂於從事每歲共捐銀二萬兩
卽以本年正月爲始遇有需用覈明支發減無
益之虛糜爲有備之經費於地方要務不無裨
益得

旨報可

三月疏陳清釐鹽茶積弊 略言川省鹽務每

年額行水引三萬一百七十八張陸引十三萬
八千二百二十九張每年應徵正稅銀十四萬
四百九兩六錢六分九釐六毫羨截銀十五萬
八千五百一十三兩六錢九分八釐嘉慶二十
四年以前皆係年清年款以後遞年拖欠日甚
一日至上年奏銷止共欠羨截銀三十三萬七
千餘兩從前戶口較少而稅羨無虧今戶口增
繁食鹽應倍於往昔而積欠轉多其弊不盡在
產鹽不旺行銷不暢也雖川省山路叢雜不無

年計 卷二 三
私販攙越而其弊尤甚者莫甚於殘引不按年
繳銷商人藉以影射重配侵占正引查上年奏
銷以前歷年未繳之引共有二十二萬六千九
百六十七張爲數多於額引且有從前已將稅
羨改歸地丁徵收而引張仍聽商人承領者假
公濟私種種情弊不一而足茶務項下每年額
行邊土腹引共十三萬零三百四十五張徵收
課稅銀七萬一千八百三十兩二錢九分羨截
銀三萬二千四百七十二兩八錢二分四釐截

三譜 卷二 三
至上年奏銷止欠茶課稅銀七千四十九兩九
錢七分三釐未繳歷年殘引亦有九千零三十
張其弊與鹽務大略相同若不徹底查辦是以
國家維正之供任奸商猾吏句串舞弊暗中侵
蝕實堪痛恨臣到任後悉心咨訪得其梗概並
悉其致弊之由因思興利必先除弊弊不除利
何由興當卽札飭各州縣先將未繳殘引勒限
全數繳銷札鹽茶道認真查辦詳細鉤稽將鹽
茶積弊痛行剔除再行斟酌情形妥議章程必

期源潔流清日有起色至所欠羨截銀兩應如
何分年彌補務使帑項有著不致有名無實俟
辦有端倪再行奏報得

旨依議妥辦欽此

是月兼署成都將軍

四月劾瀘州直隸州知州黃魯溪大甯縣知縣
德瑞合江縣知縣高殿臣筠連縣知縣陳錕請
勒休得

旨允從又奏此外各員如有不能稱職卽隨時據實奏

聞不敢稍涉姑容以仰副

聖主整飭吏治之至意得

旨實心察看欽此奉

硃筆連圈如有不能稱職等句

是月 不孝桐 會試中式貢士

五月 不孝桐 引

見改翰林院庶吉士

堂兄 相 揀發浙江以知府用

遵

旨密保川北道胡興仁夔州府知府劉裕鈔定府知府陳克讓敘永廳同知福珠朗阿合州知州李宗沆天全州知州郭彬圖成都縣知縣郭志融華陽縣知縣李卿穀犍爲縣知縣楊柄銍臚列政績以

聞又劾南部縣知縣李澍峩眉縣知縣胡宗閱清溪縣知縣閻有倫請勒休得

旨允從

疏陳合操省標弁兵情形 略言臣到任後每

於千把外委試以弓力其能挽强者實不多見從前習聞川省兵驕將悍莫識所由今留心體察皆因平日不知認真訓練考拔不得其平因而兵丁藐視官長將備復性耽安逸凡遇尋常操演不過敷衍塞責是以將不知兵兵不服將聞有認真講求營務訓練嚴明之將弁兵丁未嘗不知畏服而同官轉謂其多事因循既久習以爲常此而諉之兵驕將悍不知兵非敢驕賞罰不嚴有以啟其輕心也將非敢悍營制不肅

有以滋其肆志也勤之以訓練明之以賞罰始
終持之以公正則人皆向上而有勇亦可知方
臣是以札飭各營責令勤加練習以技藝之強
弱定黜陟之等差務期紀律嚴明勿蹈從前怠
玩數月以來弁兵尙知趨向茲屆春操調集軍
督提城十營弁兵逐一考校雖未能一律純熟
牽計亦尙合式兵丁年力皆壯並無老弱充數
連日考驗迨至合操陣勢步伐漸覺整齊施放
連環槍礮聲音頗爲聯貫牌矛各技進退擊刺

亦屬便捷當將技藝優嫻者當場獎拔弓力輒
弱騎射稍生槍礮準頭未穩者立予責懲勒限
練習其千把外委額外陳紹武等十一員技藝
疏庸分別降革示懲伏思兵可百年不用不可
一日不練况川省爲邊陲重地武備尤宜刻刻
講求臣復嚴諭將備督率弁兵按期訓練務期
技藝一律精純庶一兵得一兵之用而士卒咸
成勁旅奏入奉

硃批所陳係屬實在情形但先言弓力輒弱因訓練不

精賞罰不明之故繼又稱止齋整肅技藝精熟何移
易若是之速哉前後矛盾自不知耳可見閱伍之奏
率皆紙上空談爾到任未久如是直陳尙有良心惟
再一二歲以後恐不能振作也近聞川省營伍實屬
廢弛勿謂千里而外朕耳目不能及也欽此

六月奏陳用人理財事宜 略言古人事君以
實而才濟之所以事無不濟而才爲不可及
今人雖無其才而矢以實心亦可補才之不足
盡一分實心卽得一分實效若無實心而自恃

其才適以濟其欺詐之惡方今急務用人之外
卽重理財國家經費有常以各省地丁鹽課關
稅約計量入爲出總有贏餘卽有偏災歉歲亦
不過減十分之一二近來帑項動形支絀議者
不以年歲荒歉爲詞卽以用項繁多藉口乾隆
年間東南兩河及各項工程所用倍於今日而
庫款豐盈今則事事從儉益形不足理財之政
不講於錢糧課稅不能認真祇奉行故事耳卽
如地丁一項每年循例詳咨而朦蔽卽伏於其

中請將各州縣地丁稅課一年清查一次分別
 已完未完開單具奏則州縣自不能任意侵欺
 而帑項日見充裕得

旨報聞

八月西昌縣地震城垣衙署營房民舍盡倒壓
 斃數萬人闔城紳庶無所棲止且無食四鄉被
 災輕重略同府君聞報惻然即飛飭藩司先於
 公捐緝捕經費銀二萬兩內提銀一萬兩委員
 馳赴西昌撫卹災黎掩埋屍骸顧用項浩繁即

全提亦不敷用庫款又無項可支府君遂倡捐
 銀二千兩飭各屬協力輸助賑卹賴以不匱全
 活者十餘萬人復以城垣衙署民房皆須次第
 修理又倡捐銀二千兩更徧諭官紳共成義舉
 數月得銀十萬五千餘兩於是一律興修居民
 則分上中下戶除撫卹外仍各給以修屋之資
 未半年民得安居據情入告得

旨報聞

九月太夫人率 不孝彬 暨諸孫赴四川任所 不

全譜 卷二
孝桐時供館職不克侍往

十月疏陳鹽務積弊設法補舊欠杜新虧 略
言川省鹽務積弊不但羨截歷有拖欠卽課稅
亦有商欠官墊更有挪移羨截墊解課稅諸弊
若不詳查弊源體察暢滯情形力加整頓則日
引日長何所底止伏查川省產鹽之地不一井
竈紛沓梟徒便於販私關隘懈疏鹽船每多夾
帶或一引而行數引之鹽私行加重或此商而
佔彼商之岸任意攙侵且有稽留殘引影射重

照覓代正引祇圖收息拖欠稅羨地方官懈於
緝捕致令私充引滯以及奸胥蠹役需索百端
叢弊迭生實於鹽務大有關礙其商岸情形惟
成都華陽兩縣計商及犍爲榮縣富順等縣邊
商稍爲殷實銷岸亦甚暢行若瀘州酉陽黔江
彭水秀山開縣宜賓邛州及犍爲之增行宣恩
計口滇邊並珙縣馬邊三台射洪蓬溪中江鹽
亭暨湖北省之咸豐來鳳宣恩等廳州縣鹽岸
甚形疲滯商力亦多拮据其餘商岸尙可支持

茲^臣彙案鉤稽查明川省每年額行邊計水陸鹽引一十六萬八千九十七張應徵正稅羨截硃力連井竈鍋課共銀三十一萬五千六十四兩八分九釐六毫道光二十八年以前鹽羨積欠查覈三十年奏銷案內除已完外尙有瀘州等廳州縣未完銀二十三萬八千五百五兩七錢八分四釐七毫五絲又陸續解繳道庫銀一千二百八十六兩六分現計各屬實共欠解銀二十三萬七千二百一十九兩七錢二分四釐

七毫五絲共二十七年以前水陸鹽引合二十八年分未繳引張查覈三十年奏銷案內除已繳外尙未繳水陸鹽引二十二萬八千五百八十一張自嚴飭催追後陸續申繳二十二萬三千三百零二張又據巫山縣報明商故無著引九十六張計未繳引現祇五千一百八十三張所有繳到引內查有未行滯水引一萬一千七百七十五張滯陸引十一萬五千二百八十七張皆係瀘州等廳州縣滯引若不設法融銷則

全譜 卷二
積欠難期歸補惟以上積欠銀兩合之積滯引數參差不齊或商人虧本挪移欠多於引或商人措資墊解引多於欠更有認代未行已完正稅者勢不能按引計銀必須體察商人之貧富口岸之暢滯酌撥代銷展限帶徵還款方能有濟現經提集各商飭令量力認代除瀘州西陽黔江彭水秀山開縣宜賓等州縣滯水引一千三百八十六張滯陸引一萬一千五十張仍發各商具領按年帶徵還款外其犍爲增行宣恩

水引一千二百張有成都華陽兩縣商人認代行銷彌補積欠羨截及歷年未完正稅銀兩並認代二十九三十兩年分未行水引三百張完繳稅羨銀兩其犍爲縣計口滯陸引二萬五千五百六十張有榮縣邊商認代行銷彌補積欠銀兩其犍爲縣滇邊計口兩岸並代行銷馬邊琪縣宣恩滯水引二千四百四十張陸引五萬八千三百八十九張有犍爲縣黔邊商人願代行銷認完積欠銀兩其三台射洪蓬溪中江鹽亭

水引六千一百零九張有富順縣黔邊商人認
代行銷彌補積欠銀兩並另行認代二十九年
分水引一千八百二十二張完繳羨截銀兩其
湖北咸豐來鳳兩縣滯水引六百四十張滯陸
引二萬二百八十八張仍交本商領行補完積
欠並歷年未完正稅銀兩統予展限十二年按
年帶徵還款自咸豐元年爲始俱各按限完銀
繳引不准稍有帶欠尙有湖北鶴峰州積欠及
正稅銀兩爲數無多向係楚省委員辦運應咨

湖北轉飭速解清款毋庸代爲籌補第此次查
辦積欠滯引內惟潼川府之三台射洪蓬溪中
江鹽亭五縣商人引欠最多溯查潼商自行邊
引以來辦理早形竭蹶前因虧欠日增積至七
萬有奇無力填完始議潼犍兩商合總行鹽邊
計和衷自乾隆四十九年起至六十年止合總
期滿歸還積欠潼商復以著有成效呈請續合
十二年又自嘉慶元年爲始至十二年止二次
合總期滿年清年款嗣後潼商掣引自辦甫經

一載遂欠銀二萬餘兩據潼屬商眾合懇仍歸
健商代行二十年至道光八年三次代銷期滿
毫無拖欠旋飭令潼商撤歸本廠自行採辦而
該廠柴薪愈貴工本愈費仍係按年改配健富
兩廠並將引張推交健富商人代銷以致屢屢
虧折每年僅繳正稅不完羨截年復一年積至
十三萬八千餘兩是該商力難行鹽復辦理不
善遇有虧累卽藉人彌補厯有明徵以後引商
若再聽該商領行必將以拖欠爲得計別商之

代完未清該商之新虧又起且委員勘明三台
等縣鹽井不旺不能供配邊引該商改配健鹽
已經百有餘載與其由該商輾轉推代轆轤不
清徒滋延欠自不如從此分撥別廠妥商認行
庶於鹽務期有起色現查健富兩廠產鹽甚旺
邊岸暢行代銷潼引綽有餘裕應以道光三十
年爲始將潼商額行黔邊水引二千五百二十
二張撥交健商一千二百三十七張富商一千
二百八十五張代行各運至現定之黔岸銷售

俟將來犍富井鹽不敷配銷再行臨時籌酌辦理其犍爲增行湖北宣恩水引一百五十張久已無商領辦引稅虛懸雖設法彌補遞年積欠而以後引課仍屬無著應請

敕部將此項水引停給不發免致有名無實其漢州等處三十一州縣計口水陸引張因商貧戶逃無人接充領引民間自在附近場竈買食餘鹽每年應完稅羨久經糧戶自行集議願歸丁竈完納年清年款毫無拖欠業已歷久相安應請

仍循其舊其每年引張封存道庫隨殘繳銷俟募有妥商再飭領引配運稅羨旣歸丁竈則該州之逃亡貧乏商名冊內應卽開除以昭覈實至歷年未繳之引事遠年湮商人留存亦屬無用現飭確查實係無著者卽取具本商及同商切結詳請咨銷如此則無不填之欠亦無不繳之引惟舊欠雖已籌填新賦尤當慎重若不將歷年積弊逐予剔除恐於國課仍無裨益現經明定章程稽察井竈以清私販之源鈐束關隘

以除夾帶之弊酌加斤數以紓商力剖分地界以清黔岸勒限繳殘不使匿留作弊嚴緝私販毋令充塞嵯網取課稅於代商俾免侵挪之慮裁糜費於胥役以杜需索之門皆正本清源裕課卹商之要務臣已督飭各屬實力遵行不得日久生玩以期鹽法肅清永無延欠

詔下所司議行

疏陳茶務彌欠杜弊事宜 略言川省茶務每年額行邊土腹引十三萬三百四十五張應徵

課稅羨截硃力共銀十萬五千二百十五兩五錢二分九釐課稅均有拖欠殘引未盡繳銷其弊與鹽務等推原邊岸疲滯之由實因運送艱難腳費過重歷年口外牛隻疫斃馱載甚稀引茶不能迅抵邊地銷售因之虧折加以邊腹各商向串作奸將行殘腹引捏稱滯銷重照影射朦混請改一引竟行數引之茶遂致邊岸充塞正引停滯邛州等處商人俱各積欠纍纍至腹岸疲滯實由引商不歸畫一有一岸而數處商

人共行有一商而行銷數岸彼此攙越受累相率延欠若不將影射改引之弊剔除則從前之積欠彌補無期日後之新賦拖欠益甚茲查川省茶引行邊較多腹商每將腹引推給邊商代引因而重照影射充塞邊岸弊難枚舉現飭嗣後腹引歸腹邊引歸邊彼此不准推代並飭於打箭鑪廳城建設總埠議立商總稽查如有引茶斤數不符卽由該商總稟明打箭鑪廳照私茶例論罪儻商總有扶同刁難等弊一經查出

立予究懲庶邊岸不致充塞而正引可期暢銷至於額行腹引向定引岸未能均勻以致一岸數商一商數岸自應酌量變通以期課稅無誤現在各廳州縣暢滯情形俱經確切查明除懋功廳管理五屯行銷腹引一千張仍照常給發並越嶲馬邊雷波松潘峩邊打箭鑪等廳地處邊隅向無引張毋庸派給腹引外其餘腹引一萬四千九百零七張就各屬缺分大小戶口繁簡酌量分派行銷每引課稅羨截硃力俱照向

年譜 卷二
定之數其何廳州縣應採配何處茶斤卽由該
地方官查議如舊商情願充當仍聽其便有逃
亡故絕立即招募殷實之人承充每屬或一二
名或二三名均由該地方官酌定無論新商舊
商承領茶引若干採配何處均照往屆充商成
案辦理其引由配茶之地方官截角催課繳殘
則歸行銷之地方官報銷如此明定章程則邊
腹兩不相侵而各商亦不致受累拖欠所有各
商未完羨截銀三萬九千二十四兩四錢七分

六釐如令刻期完繳實亦力有未逮應請自成
豐元年起展限十年逐年隨額引帶徵還款以
示體卹其追繳殘引責成關隘及緝私裁費各
事宜均照鹽務一律辦理

詔下所司議行

十一月太夫人率 不孝彬孫承烜承熾承勳同
至任所

十二月疏明川省財賦情形 先是戶部覈覆
大學士耆英條奏理財之要以地丁鹽課關稅

全譜 卷二
爲歲入之大端以兵餉河工爲歲出之大端得其弊之所在認真革除害去而利自見

上命各直省督撫查照辦理府君奏言四川省每年額徵地丁錢糧年清年款並無帶欠其銀除留支各款外餘悉解存司庫報撥留供本省兵餉卹賞各項支用並無解部銀兩關稅一項每年共徵收銀二十三萬三千餘兩遇閏加徵銀三千餘兩除留支營汛兵餉公費養廉書役飯食賞需口糧夫役工食等項外正閏實解司庫銀一十

五六萬餘兩不等如有贏餘儘數報解歷年徵解覈與額定銀數有盈無絀尙不至於疲敝至鹽務項下共積欠銀二十三萬七千餘兩業經

臣認真剔除將所有滯引分撥暢銷商岸代行按年帶完積欠統限十二年完清不致款歸無著此川省地丁關稅鹽務三端實在情形也惟查覈戶部原奏內稱若徒責其催科不爲裁其浮費懦者因賠累而益致虧挪强者藉挾制以遂其貪鄙實爲片言扼要蓋儉約可以養廉而

糜費實足致匱迨至匱乏旣形勢必移正款而
供私用糜費之事不一而酬應陋規居其大端
然酬應陋規猶不過十之二三而暗飽私橐則
十居七八上司旣利其酬應雖屬吏上虧國帑
下腴民膏明知之而不敢問且將爲之彌縫吏
治日壞虧空日多良由於此欲除其弊必先自
大吏克己始正己方能率屬大法然後小廉未
有己不正而能除弊者亦未有能正己而弊不
除者臣知識淺陋深恐上負

鴻慈故於所歷之區持定克己二字以之律己並以
之勵屬冀以愚誠補才力之不足是以於到任
後卽通飭所屬力黜浮華裁減浮費並仿照臣

在山東時籌備經費成案由臣與司道倡率各

屬歲共捐備經費銀二萬兩以備要需每接見
屬員勸以廉儉勤慎崇實黜華以地方公事爲
重不可仍沿浮靡陋習是以此次辦理西昌災
務各屬踴躍捐貲得以工賑及時並辦不動帑
項凡此樂輸之所出無非節省之所餘足爲裁

年譜 卷二 吳
減浮費有益於公之明效第當持之以實力要
之以有恒庶吏治可日歸淳樸而財用不致有
耗竭之虞庫項亦可免虧挪之弊臣已檄令司
道於所屬徵解各款隨時稽覈務使儘徵儘解
不准絲毫存留屬庫交代之際責成後任覈實
確查仍飭該管道府一體察訪一有虧挪卽從
嚴參辦似此層層控制各州縣知有儆懼更不
致有侵蝕之虞得

旨知之非艱行之惟艱斷不可託紙上空談一奏了事
致行與言有相違耳誌之欽此

奏覆常監倉穀責成地方分別出易邀免參賠
先是查辦各屬倉穀部議令查延未糶變年
分遠近及現辦碾穀短數分別參賠府君奏言
川省常監倉穀試碾年分最遠之穀每石得米
不過三斗有餘迨後續報有得米四斗有餘者
自雍正乾隆年間收存接通省州縣統計共有
十餘萬石歷未辦理糶變事歷百年官經多任
自不能專歸咎於現任之員若追溯從前各官

年譜 卷二 五
分別咨追賠補轉恐有名無實於事毫無裨益
惟有陳穀變新則碾米自足成數臣已飭令各
屬將收存穀石分別年分遠近酌量地方情形
或借或糶妥爲辦理其借糶穀數俟秋收後催
收買補歸還原額如收不足數及糶價不敷買
補卽責成該州縣如數賠足儻價有贏餘亦令
儘數買穀存倉如查有糶多報少侵漁滋弊及
借糶後不能歸還原額而捏報全完者立卽參
辦若存穀較多不能一次全行借糶卽分年出

易其有因該處本年糧價甚賤借糶皆有窒礙
者留俟明年青黃不接之時再行辦理計三四
年間總可一律變陳爲新所有前項碾不足數
之穀亦可悉成新穀卽不致稍有短缺是於變
糶之中已寓賠補之意相應仰懇
天恩俯准免其參賠仍責成現任地方官分別出易
俾辦理得有實濟

詔下其議行

奏勒休知縣聞有倫懷疑妄稟經鄰省督臣咨

回查辦請

敕徹審

上命成都將軍奕公湘會同覈辦尋審得實褫閻有倫

職

十二月

頒賞

宣宗成皇帝御製詩文餘集全部

